

Hopi joven ta bira victima di practica ilegal

Aborto ta causa desastre na Aruba

Mayornan mes ta sostene abortu pa scapa supuesto verguenza

ORANJESTAD(AAN)--

E cantidad di jovencitanan cu ta sali embaraza ta alcanza un punto di preocupacion. Mes preocupante ta e cantidad di joven cu ta dicidi pa abortu, cu den vista di publico poco poco kier bira algo normal, mas ainda pa motibo cu lo tin mediconan cu no tin ningun problema pa comete abortu, cu ta keda ilegal. Pero e consecucionan ta pa e jovennan y otro muhernan. Un cantidad alarmante mester biba cu consecucionan di abortu y hasta tin caso caminda e patient lo ta keda colga entre bida y morto.

Ya pa basta dia DIARIO ta tras di mas informacion, cu ta hopi dificil pa haya. Esaki pa motibo cu abortu pa popular cu e por ta bira, ta keda un caso ilegal y ademas mayoria ta conciente cu nan ta haci algo cu no

ta bon y hasta peligroso.

Informantenan clave a bisa DIARIO cu e cantidad di abortu cu ta worde realiza na Aruba ta alarmante. Preocupante ta e hecho, cu mayoria di muher no ta realiza cu abortu ta contene riesgonan grandi, cu ta varia di morto te keda infertil.

Bida di hopi joven a worde corta pa loke ta trata e posibilidad di haya yiu un dia ya cu den hopi caso abortu ta solucion pa un rato, pero despues problema serio ta manifesta su mes cerca e jovennan. Manera a worde bisa, durante conversacionnan cu DIARIO a sostene cu personanan cu sa di e asunto, hopi

biaha e jovennan ta haya completo sosten di nan mayornan cu ta dicidi di laga e yiu comete

abortu solamente pa scapa cara di loke nan ta considera verguenza. E mayornan en cuestion ta prefera di laga nan yiu comete abortu promer cu e duna luz pa asina mundo no ripara kico a pasa.

Mientrastanto nan ta causa hopi problema pa e mucha. A worde indica cu abortu ta algo cu ta bay contra naturaleza y por lo tanto ta algo peligroso. Den e practica hopi muher ta keda presenta cu e realidad cu nunca mas nan no por haya yiu, mientras cu otronan ta keda sufri di cierto molestianan cu abortu ta encera.

Tin caso di muhernan cu ta worde hiba na rand di nan graf, pero mester cera nan boca ya cu

abortu ta algo ilegal y na momento cu nan denuncia e medico cu a kibra ley y practica

abortu, nan ta pone nan mes tambe den problema. Pesey tur loke ta abortu, ta bira mas peligroso, ya cu no tin control.

Un punto cu ainda mester haya mas claridad ta si hospital ta permiti casonan di abortu tuma lugar bao su dak bao capa di curetage, cu ta un operacion chikito. Informantenan ta bisa cu si, pero prueba ta dicifil di haya ya cu mayoria di esnan cu ta aborta y nan familianan ta hacie hustamente pa mundo no sa nada y lo sigui cera nan boca.

Pero e cantidad di casonan di abortu lo ta alarmante y nan tin consecucionan grave especialmente pa jovennan, cu despues di abortu hopi biaha ta keda den un estado mental for di balanza ya cu nan no semper ta realmente para tras di loke nan a socede. Especialmente ora abortu tin consecuencia mas serio, e jovennan ta bira victima directo.

Si na Aruba abortu a bira cos di tur dia y bon negoshi pa cierto grupo di mediconan, den exterior, manera na Merca, el a cuminsa impone un dilemma nobo. Na Merca awor tin clinicanan especial pa salba bida di muchanan cu nace cu seis luna o hasta algun siman menos den cierto caso. E avance medico a keda por ehemplo describi reciente-

mente pa Newsweek cu a bisa cu e desarojo aki ta impone

algo nobo tambe. Pasobra e ta demostra cu di un banda ta aborta, o cureteer manera hende cu kier sigui sconde ta bisa ora nan aborta, mientras di otro banda a keda demostra cu por scapa e yiu. Cu otro palabra, ciencia mes awor ta yega na e punto cu e no por bisa mas cu abortu no ta encera asesinato di un criatura, ya cu ciencia mes ta yuda scapa e criatura cu nace promer cu hora.

Si emocionalmente abortu ta un problema, pa salud tambe e ta contene problema serio. Pero aparentemente na Aruba esaki no ta conoci, ya cu e cantidad di muhernan y especialmente jovennan cu ta aborta, ta sigui crece y aparentemente nan ta haya mediconan, cu ta dispuesto pa risca nan permiso di traha como medico, pa haci bon negoshi cu abortu.

Informantenan a indica cu mester tene cuenta cu na e momento aki pa algun cien florin, jovennan di hasta 14 pa 15 aña ya si kico ta abortu y hopi di nan ya a conoce e diagnostico cu ta bisa cu nan a keda manca pa resto di nan bida. Pero aparentemente henter e asunto ta manera Mazon, ya cu como tur esnan involvi ta castigable, tur hende ta cera boca y ta dificil pa autoridad pone man ariba e mediconan abortador y e patientnan.